

## LI JARDIN

Es segur que, sièu pas encaro sus lou cop d'acaba ma jouncho, mai acò me dispenso pas de tèms en tèms, d'entourna un uei afetiéu sus lou passat. E toujours me revèn, coume un mirau espectaclus, lou jardin acuiènt e carga d'istourièto de ma pichoto enfanço.

O pèr acò, es verai qu'ai agu uno bravo crespino d'encapa, d'enfantoun, aquéu Eden meravihous. L'oustau que lougavon mi gènt, se capitavo à l'orle dóu vilage, emé grand envans, croto vinassiero, champ de blad e, lou mai, un magnifi e vaste jardin. Aquèu, proun grandas, ero desparti en très caire de terro. Un, reserva au Pelot, qu'ero travaia pèr lou bayle de la proupieta, e li dous autre, atribui pèr mita à n'aquel ome e à moun papet.

Quete gau, quant, emé ma pichoto barioto, me bandissiéu darrié moun grand, pèr « ana travaia au jardin » ! Eh o, fugeron asseguramen mi proumiro joio d'enfant-pichot omenet, aquelis agradio batudo. Apetega e mai qu'à l'aise au mitan dis ourtoulaiò e dis aubre fruchié, me n'en rapelo d'aquéu tèms, pas que li journado ensouleiado. Tourne toujours veire aquéli pero vo pruno maduro que rapugavo, e que lou jus melicous me pegavo li labro e li gauto tamben. Me revènon autant proche, li charmant cascaiadis de l'aigo dóu pous, qu'emé ma pichoto trenqueto adraivo dins li rego di liéume (quente daumage que n'en pousquesse pas faire parié emé noste fougous Vidourle !). Es verai que, mai d'un cop, quand lou regoulamen ero un pau trop aboundous pèr ieu, lou luchet de papet m'ero uno ajudo requisto e soulido. Mai, ero ieu qu'avié la respounsableta de l'aseigage, me l'afourtissie de-longo. Proun souvènt, proufichave que l'aigo negavo li pastenargo, pèr en derraba une poulideto. La netejavo dins l'aigo courrente à mi pèd, pièi, après l'avé espouchado di dous coustat, la cruscavo dins de « croc-croc » qu'entènde encaro, coume se fuguèsse aièr. Soubeiran e urous, mestrejavo sus moun mounde, negant li fournigo, recampant li cacalausò en manado e li journado trescoulavon, siavo e drudo d'esperimen.

Mai i'avié pamens, un recantoun dóu jardin que m'èro enebi en plen. Ras la muraio d'encencho, s'expandissié à boudre e à bèl èime, uno bartassado espesso de patanoun. Tras que counscienciousamen, moun papé cad'an, lis arrestavo pèr qu'envahisson pas li culturo, mai s'avisavo jamai de li derraba. Fau dire qu'aqueli tubercule, eron pèr èu, de souveni pognènt e toujours forço presènt de la darriero guerro, d'aquéu tèms pas si luenchenco. Li doulourouso restricioun e patimen d'aquelo maluranço, endura crudelamen pèr éu e touto la nisado, l'avié marca durablamen, d'un biais que se pòu pas escafa. Autambèn, emé jalousié, aparavo-ti sa reservo sacrado. Aquéu carra de patanoun gardè sa plaço, courrentamen eneiga e entre-tengu de bri o de bro, tant que papet fuguè di nostre. D'à cha pau, après sa despartido, l'atiramen pèr moun jardin requist se degaiavo un brisoun e cregnavo de lou vèire destrachi. Urousamèn, gaire de tèms mai tard, avèn fa Sant-Miquèu dintre lou vièi vilage. Tengu pèr d'àutri ativeta, trevant dins li carriero e plaço lou dijòu avans d'investi l'estadi lou dimenche, ai pas jamai revist lou bèu jardin que me faguè tant pantaïa dins lou tèms. Sabe aro, emé l'escart dóu tèms e la sapiènci de l'age, qu'aquelo aparènto indiferènci, éro pas que lou mejan de garda flamejanto dins moun amo e moun cor, la farandoulo d'ime inamoussable e pouderoso de mi remembranço d'enfanço que, sèmpe, me pourgiran forço gau.

Nouvè DANIELE

